

# Epesaasihiyaapi Utipiho

## Autahaatiho Nyangi Wanihiyaanenyamataise

### Kimandi Epesaasihiyaapi Utipimandapi Nesipihande

Porihoai isipi napwitohipihi napuhauhi napwitati bindataati 61 A.D. hura kimo utipimo jipatipiyahore. Isihiya usa saiwi gwinyaawaayopo, Poriho isihiya Epesaasihiyaapaahihi gwinyaataati kimo utipimo jipatipiyataamaise. Owetise. Autahaatihomi isihiya usaisangi ami nepi awititaatiwi gwinyaati jipatipiyataise. Kimo utipimo Autahaatiho isihiya kahatamatipetahiya gaata numwaati Jisaasihoaisati neti timaamaihonihi kiya noaipapi ambipati naasaipatamihiyamatitaatiwi nusesipati kataunjahore.

### Epesaasihiyaapi Piwiha Napimasataise

Komi piwiha namasisiha (1:1-2)

Autahaatiho nyangi gaata nanyamaasihi ami nyahi Kiraisihopi  
giwunyaawaati nyahi ninaasonini ninaasaanini ami nyahi  
taahiyihiyaanini komihiyaanimatotihandapiha (1:3-3:21)

Gaahiri wanihireti kaiwi bimitaatiwihandapiha (4:1-6:9)

Awaisihomi watipihandaahi tipipa kaitihaahandapiha (6:10-20)

Poriho isihiyai gaahure undati komi piwiha osasepihaati owemasiha  
(6:21-24)

**1** <sup>1</sup> Nini Porihonini Jisasi Kiraisiho komi otipipati kawitandi nanimihanati neti natanoaasisihonine. Sandi ami nisapi Autahaatiho siyati ko nisi otipipati kanito tati maaritati gwinyaasitihanda nanimihanati natanoasataise. Sahi Autahaatihomi isihiyaati aunahipati awaipati Epesaasihanda bimohiyihiyaatapi utipiho kimo jipatipaindi nusaasataayo. <sup>2</sup> Autahaatiho nyami Apihouni ami nyami Awaisiho nyangi nyainjatisiho Jisasi Kiraisihouni kindari sangi gaahati kasimi sami maariho nepi yatihisipi japatimi, ami nepi napaisaatisamasaihi ami sahi sami maariho biyati yatihisitati wisaitane.

**Autaaahaatiho Kiraisihoetapi Yamihapataatihapihaiwa Gaahaiwa  
Nyami Maarihoai Nyatatamanitandihaiwa Nanyinyataise**

<sup>3</sup>Autaaahaatiho ami nyami Awaisiho nyangi nyainjatisiho Jisasi Kiraisihomi Sapihopi nyahi maaritaati koai nyahi saundaati, 'Kinyi Gaahonje gaare,' undaati newaati mepi autaaahemwaitihaawo. Sandi nyahi Kiraisihoaisaati timaamaitohitihanda nahataapa yamihapataati hapihaiwaametirihiretihaiwa, nyami maarihopihaiwa, komi gaahaiwa Autaaahaatiho asakiyati gaamati wapa simehimwaati nahataapa tisaahiwati nga nyangi nanyinyataise. <sup>4</sup>Sandi Autaaahaatiho komihireti kiyataise. Autaaahaatiho aimi jihura yapipati sangi kiyati ahaihi, ami kati sangi noaipasihura nyangi nanyamihanataise, Kiraisihoaisaati maasi timaamaititihaawo. Iyati ami sandi nyahi nehi titihi ko sawaho Autaaahatihomihyaanimataati, ami komi ndiheti nyahi maipihaiwaapi piwiha nyamiheti wa ahimotati titihi ainahiyihyaanimatitihaawo. <sup>5</sup>Ami jihura Autaaahaatiho nyangi maariho nanyinyataati nyahi komi manyinyaanimatitihaawi nanyamihanataise. Sandi Jisasi Kiraisiho nyangi japihi nanyamaitandi ko otipipati kaindahanda nyangi Autaaahaatiho nanyamihanataise. Ami sandihi sawaho satati, nini kiyai sawindi saitando, tati gwinyaati ami maaritindahandaahi kiyataise. <sup>6</sup>Kiraisiho Koai Autaaahaatiho maariho numwisihomihetapi nyahi wapa gaahapa windi kamaayaati nehihandi gaahati pihitati nyangi Autaaahaatiho kanyisataise. Isi sikandapi nyahi Autaaahaatihoai ambipati awaipati nunyaati mepi autaaahewaumwaitihaawo, ami ko nyangi apipaahi gaahati nehihandi kanyindahandapo. <sup>7</sup>Autaaahaatiho so nyangi gaahandi apipaahi aungwohandi tisaahiwati kanyisati maariho nanyinyataise. Aihi nyangi japihi nanyamaitandi Kiraisiho napotaise. Napoti komi jitipati nuhaasipata Autaaahaatiho nyami maipihaiwa nenyamataise. <sup>8</sup>Ami apipaahi akitinihi nyangi Autaaahaatiho gaahati kanyisati, ami nahatewa gwinyaawaati mmondihawo amitiha gaahandi gwinyaitihaahandi nanyinyataise. <sup>9</sup>Jihi aimehura Autaaahaatiho saiwa Kiraisiho otipipati kaipataahi kaitandi gwinyaataise. Saiwa saindi saindi kaitando tati gwinyaati ami windi amusaati nehi komiheti noaasati ahotinjihande. <sup>10</sup>Autaaahaatiho kaitandi gwinyaasipapa siyate: Nahataapa jatata titihemati kaimi noti asisiha ko sawaho namihainjihetitanihiki kura nahataapa yamihapataatihapauni ami yapipataapihapauni neti timaamahiwati ahoyati Kiraisihomiheti ahionihiki ami ko kapa neti mitiho Awaisiho jihoematati kapaisi jatitando.

<sup>11</sup>Jihura Autaaahaatiho sawaho gwinyaati maaritindahanda nyahi Judaahiyaanangi nanyamihanataise, ami nyahi noaipawaati akitinihi komihyaanimatitihaawo. Ami sandi Autaaahaatiho sawaho jiji wuwanihuraapi satati, nini sapa sapa saindi kaito, tati

gwinyaati maaritirihireti nahataapa japepihirati kiyataise. <sup>12</sup> Nyahi Judaahiyaanini jiji namasaati Kiraisihopi giwunyaawaati ami ko napitandihuraapi kiyaaninihi jatohiyihiyaanine. Iyaati ami nyahi kopi jatihaawi Autaahaatiho apipaahi gaaho sanahihoe, taati kopi nasisoaari gwinyaawaati koai, Kinyi Gaahone gaare, undaati mepi autaahewaumwaitihaawi nyangi nanyamihanataise.

<sup>13</sup> Iyataati ami sangisangi sikireti kasimatataise. Sahi piwiha akaaha gaaha waniha aimi atisopo, sangi Autaahaatiho kaara nasamaitandihandapiho. Aiwi sahi aimi Kiraisihopi giwunyaawaayopo. Saiwi sahi Kiraisihopi giwunyaahauhi ami komihetapi sahi titihi nehi Autaahaatiho sawahomihyaatimatitaatiwi sahi nisihiyaate satati wapa jihapihapaamatiya ko komi Itipiho Gaaho sangi nasanyataise. Ko piwiha jihura watipitati katati wisasisiha ka japepihirati sandi sangi kasisataise. <sup>14</sup> Nyahi Autaahaatihomi Itipiho Gaaho wapa jihapihapaamatiyaati aimi nehaayo. Nehaawi nyahi aimi siyaati mmonaati gwinyaahaayo: Autaahaatiho kimo Itipimo nanyamisimo wapa kahapaamapipa nahataapa gaahapa komi isihiyai numwitandi watipitati katimbipa nyangisangi naito taato. Iyaati Autaahaatiho ipotihandi apipaahi kiyaanangisinihi nanyamaati nyaiwasonihi nyami maariho winyaitonihini maarita koaisaati maasi bimitihaahandapi jatimi nohaayo. Autaahaatiho siyati otipipati awaiwaiwa nyapi kaindahandapi nyahi maaritaati koai saundaati, 'Kinyi apipaahi gaahone sanahihone,' undaati komi ambipati mepi autaahemwaitihaawo.

### **Autaahaatiho Epesaasihyai Gaahandi Gwinyaitaatiwihandi Numwitandi Poriho Kiyaapi Gaapundataise**

<sup>15</sup> Ami kimandi kandi sangi Autaahaatiho kasindimandapuni ami sahi akitinihi nyangi nyainjatisiho Awaisiho Jisaasihopi giwunyaapi ami Autaahaatihomi isihiya, Kiraisihopi giwunyaahohiyihiya nahatiyai maariho nunyohitihandapi piwiha nini atindi netaati, <sup>16</sup> ami nini gaapundataahura sapi nasisoaari gisunyaati Autaahaatihoai saundataato: 'Kinyi Gaahone gaare,' undataato. <sup>17</sup> Saunditi nini nyangi nyainjatisiho Awaisiho Jisasi Kiraisiho atotipiwesati piwaundati gaapundati mepi autaahemwasiho Autaahaatiho ami nyami Apiho apipaahi gaaho sanahihoe ambamboho yamihapataatihi bimisihoai sapi nasisoaari gisunyaati piwaundati taati nunjenataayo, ami ko sangi sahi gaahandi amitihya gwinyaitaatiwihandi nasanyati neti gisunyaahonihini komi piwihaami tanyaahaapi sangi biyati nasesipatonihini sahi mmondaatiwo. <sup>18</sup> Aindi ami ko sami maariho omanjititihini waati neti nuwati jainjapwaati gisunyaahonihini, ami sahi baiwi gwinyaapi ami apipaahi gaahaiwa sangi nasamitandi nasamaasipipaapi akiti naito, tiwi nasinjahandonihini jatimi nutaatiwihandapimaawi

gaapundataayo. Sapa katohipipa komi isihiyaanangi apipaahi gaahaiwa nanyamitandi watipitati katimbipaapito. <sup>19</sup>Iyataati ami nini gaapundotimandi Autaahaatihomi watipihandi apipaahi awaindihandi nyahi kopi giwunyaahohiyihiyaanamiheti waati otipipati kiyati ahotati taati anditinyaisitimandapi sahi gwinyaapi mmondaatiwe. Sandi Autaahaatihomi watipindi apipaahi awaindihande. Nyahi kandi newaati windi nga tiwitapaawaati mmondo. Kimikandi Autaahaatihomi watipimandi awaindimandi nyangi taati nyatatamanataise. <sup>20</sup>Kimikandi jihura Kiraisihomiheti otipipati kiyati ahondaise. Aihi Kiraisiho napwihi komi watipihandi apipaahi awaindihandi kimikanda Autaahaatiho Kiraisihoai japihi ahowimati numwaasi niyati yamihapataatihi otipipati awaipati nunyati komi ikwiri gaatihiraihoaangi ahiwihi bindataise. <sup>21</sup>Sapihi bindataati Kiraisiho apipaahi watipihohi Awaisihoematati itipihohi watipihandisahaiwa watipihaiwa yamihapataatihi jatiwaiwa nahatewai daahemwati nusatipihaihi nahataapihihi osamati jatataise. Iyati ko Kiraisiho otipipati kaitandi ambipati wandiha nesiha usa kiyaaami otipipatapi ambipati ami wandiha awaipati awaisiha wani kimurauni ipoti ipotihurauni nehohiyihiyai nusatipihaihi apipaahi awaipati wani kimurauni ami ipoti ipotihuraapisangi ahoyati netaise. <sup>22</sup>Autaahaatiho Kiraisihoai neti Awaisihoematosati nahataapai jatitandi watipihandi nunyati ami neti komi asimwaatitihahi ahiyataise. Aihi ko Kiraisiho noaipati nahataapaami Awaisiho Jihoematati kapai jatataise. Aihi sandaahi ko noaipati isihiya kopi giwunyaahohiyihiyaami mitiho jiho Awaisihoematati kiyai ko iwinjatataise. <sup>23</sup>Isihiya Kiraisihopi giwunyaahohiyihiya komi ambipatamataiwihiyaare. Komi ambipatamataiwihiyaasi ko Kiraisihomihatihahi gaamapi kiya bimauhi ami ko Kiraisiho sawaho komi ambihiyaamihatihuni ami nahataapihihi gaamati neti tisaahiwati bindataise. Aihi nahataapa noaipati gandaise wapa windi nausetihimetato.

**Nyahi Aimi Napowaamahonihiyaanangi Autaahaatiho Kiraisihoaisati  
Maasi Asitimatitihahandi Nanyamihi Asiyihiyaanimatihaaayo**

**2** <sup>1</sup>Jihura sahi titihimetihaiwa ami maipihaiwa kihaiwa kihaiwa kaimbiwihiyaate. Iyauhi ami kaiwa sangi tisawihahi ami sahi aimi napomawaahiyaatamataiwi bindawaawi Autaahaatihomihaiiwaapi komi Itipihohi katiwaiwa sahi windi mmoniwi gimaasunyaatahiyaate. <sup>2</sup>Aiwi sura sahi kimaapi yapibatambi maipihaiwaatihi daiwi bindawa isihiya yapipatambihahi daayohirihireti daiwi itipihohi maipihapa yapipatami autaaahi mbipa tiwipataatihi bimiwaiwai jiho winjatisihoai iwinjapepihiriwi niwipinjambiwihiyaate. Iyataati sapa itipihohi maipihapa wani isihiya Autaahaatihomi piwiha nemapi koai pohipiwiwi ahosumwahohiyihiyaamiheti taati otipipati kiyataise.

<sup>3</sup> Jihura ami nyahi nahatiyaanini kiyaamatiyaati bindiha nyami maariho jahiho maaritati gwinyaati gwimbipa kiyaati ami nyami ambipati amitiha gwinyaati maaritimbipa kapa kainjaahiyaanine. Nyahi siyaati bimohura isihiya saiwa kiyohiyihiyai nawihomatiyati wihoaanjhandi maipihandi numwitandi Autaahaatiho neti timasitihandi nyahi nga naitaanihe, ami nyahi siyaati saiwa maipihaiwa kiyaati bimohitihandapo. Ami nyahi isihiya usa nahatiyaamatiyaati kiya kiyohirihireti kiyaati bimainjaahiyaaniso. <sup>4</sup> Siyaati nyahi nawihomatiyaati yaasihandi wihoaanjhandi naitihati kati ami Autaahaatiho maariho apipaahi aungwohandi awaindihandi asipaindihandaahi ko nyangi komi maariho waati awaindihandi nanyinyataise. <sup>5</sup> Ami nyahi Autaahaatihoai maipihaiwa kawisohiwaiwa tiwati yainyamwaasihi ami nyahi aimi napowaamihaahiyaanamatiya bindihaawi, Autaahaatihomihaiwaapi komi Itipiho katati neti nunjiwaiwa nyahi windi monaati, ami gimunyaahonihyaanangi Autaahaatiho Kiraisihoaisati ahoyati wani asiyihyaanimataati bimitihaahandi nanyinyataise. Ami sandihi akite. Sahi wapa gaahapa windi kamaiwi nehihandi Autaahaatiho komi maariho apipaahi awaindihandi nanyinyataati ami ko apipaahi gaahandi kasisati sangi japihi nasamaataise. <sup>6</sup> Iyati ko (Autaahaatiho) Kiraisihoai ahowimati neti asohoemati otipipati awaipati nunyataise, isihiyaisuni ami wapa nahataapaisuni wapa simehimwaati ko awaisihoematati kapai nahataapipihini osamati jatitando. Aihi ami ko kapai aimi nahataapipihini osamati jatataise. Aihi ami nyangisangi Kiraisihoaisati maasi nyami maipihaiwaatihapi ahonyimati asiyihyaanenyamati Koaisati neti nyamaamaisihi Kiraisiho isihiyaisuni wapa wapaisuni jatimbipihini koaisaati aimi jatihaayo. Ko sandi isihyaanini aimi Kiraisihoaisaati ohiyihyaanangi kanyisataise. <sup>7</sup> Ami ko komi maariho Kiraisihoetapi apipaahi awaindihandi asipiyati nehihandi gaahandi isihyaanini wapa gaahapa nyahi windi kamaayaahandi kanyindimandi isihiya nahatiyai wanuni ami ipoti ipotihuraapisangi neti nunjitande. <sup>8</sup> Iyataati sa nini sandaato. Sahi Kiraisihopi giwunyaahohitihanda Autaahaatiho sangi sahi gaahapa wapa windi kamaiwi nehihandi gaahandi kasisati japihi nasamaataise. Sahi sawanaati wapa gaahapa kamaiwi nehihandi Autaahaatiho gaahandi kasisati nasanyataise. <sup>9</sup> Sahi wapa gaahapa kiyauhi kandapi Autaahaatiho sangi gaahati kasisataamaise. Isi ami sahi sawanaati naimaatiwi genanitaatiwi owetise. <sup>10</sup> Nyahi Kiraisi Jisaasihoaisaati timaamaitotihanda Autaahaatiho nanyamaati neti wanihiyaanenyamataise. Iyati ami sandi nyahi otipipati nehi gaahapaahihini mmonainjaati kaitihaawi sandi ko nyangi kanyisataise. Iyati ami nehi gaahaiwaahihini kaitihaawi jihura Autaahaatiho neti timanati nyangi kiyati ahinyimbipa kapa japepihira gaahapaahihini kiyaati bimitihaawo.

**Isihiya Manditipiniwi Tiworisaimatohiyihiyai  
Kiraisiho Neti Naasiyemataise**

<sup>11</sup>Sahi aimi gwinyaapihyaate, Judaahiya isihiya usihiyaami ambipati namandipapi ahoaandahiyaare. Kiya saiwihiyaasi sangi satiwi ambihisatawaaayopo: “Ambipati nahomaamandipapi ahimoandahiyaate,” tiwi ambihisatiwihiyaate. (Sandi kiya kiyaami ambipati namandipapi ahoaamahohitindi nehi kiya sawana kiyaami ambipateti ikwira kainihohitihandapitopo). <sup>12</sup>Sahi gwinyaapise, ami jihura sahi Kiraisihopi kaanihi sangi yandihi bimambiwihyaate. Sahi Autaahaatihomi isihiya Isiraherihyaamihatih windi bimambiwihyaatimahe. Nehi sangi kiyaami ipaahaapi bimambiwihyaate. Aiwi Autaahaatiho komi isihiya Isiraherihiyai ipoti wapa kawitandihapaapi piwiha watipitati katati wisasati numwisahaami ipaahaapi bimambiwihyaate. Aiwi wapa gaahapa ipotihura sangi nasoaipaitandihapaapi jatitaatiwihapa owehiyaati bimaawi ami Autaahaatihopi sahi mmoniwi gimaasunyaatahiyaati bimambiwihyaate. <sup>13</sup>Saiwi sahi jihura Autaahaatihoapihapi nehi sangi yandihi kaanihi bimambiwihyaate. Saimbiwihyaatitawaahandi kandi komi jitipati ko napotaati nuhaasipata sahi Kiraisihoaisawi timaamaitiwi Autaahaatihomihini komi deti utatototi aimi napiwi bindawaayopo. <sup>14</sup>Ami Kiraisiho sawaho nyahi ususaanangi neti ahoyati nyamaamahiwati nyami maariho ambipati yiyandihitimbipa nemati ami nyami maariho omanjititih neti napaisaatinyamataise. O jihura Judaahiya isihiya kiyaami dawaataatapihiyai manditiwiwi tiworisaimatiwi ahosumwapi matambipa niwi yatihiri asitiha ususaami otihapihi napwitiwi bimambiwihyaare. Saiwi bimambiwihya kiya ami Kiraisiho napwindihanda matambipa yatihiri nisapundimbipa nupwisasati nemataise. Nemati neti ususai numwaati timaamaisihi kiya manditiniwi tiworisaimatotihandi namapi owetih kiya noaipapi nehi isihiya naasiyaimatawaaayopo. <sup>15</sup>Kiraisiho Judaahiyaami winihapipa Mosesiho numwimbipa kapaami piwiha taahih nahatauni ami winihapipauni aimi neti owemati nemataise. Ko sandi siyati Mosesihomi winihapipa Judaahiyai numwimbipa nemasitimandi tanyaaha siyate: Isihiya Judaahiyaisuni ami kiyaami dawaapipihiyaisuni neti ahoyati timaamahiwati isihiya wanihiya nehi naasiyaahemaitande. Iyati siretapi kiya manditipiniwi tiworisaimatiwi bimotihandi nemati kiyaami maariho omanjititih neti napaisaatumwaitande. <sup>16</sup>Iyati ko Kiraisiho ipi titih atawihateti napwindihanda Judaahiyauni ami kiyaami dawaapipihyauni manditiniwi tiworisaimatiwi bimohitihandi nemati ususai neti ambipati naasaipateti timaamahiwati numwaasisa Autaahaatihoapihimaitande. <sup>17</sup>Kiraisiho nasati piwiha gaaha waniha ausaati satati, “sami

maariho omanjititihini napaisaatitonihini bipi napaisaati bimaawise,” tati piwiha katati ausaataise. Sahi Autaahaatihooapihapi nawisawii yandihini sangi kaanihini bimauhihiyaatangisuni ami isihyaani usaanini komihini deti utatototi bimohiyihyaanangisuni piwiha sami maariho ambipati napaisaatitihini kasatataase. <sup>18</sup>Ye akite. Kiraisiho nyangi neti nyamaamaisihini nyahi noaipawaati isihyaani nehi naasiyaanimatihaayo, ami Itipihoni nehi naasohi nyangi nanyamaasi niyonihi nyahi Apihoenda napitihawo.

### **Nyahi Kiraisihomi Isihyaani Nahatiyaani Autaahaatihomi Añañi Akañañamatiyaahiyaane**

<sup>19</sup>Ami wani sahi nehi maatimaatapi gohaharihiyaati yapipati owehiyaatimaahē. Owe. Sahi Autaahaatihomi isihiyaisawii naasikiyaatimatawaaoyopo. Sahi akitinihi titihini Autaahaatihomihiyaate. Sahi Judaahiyaami dawaataati ipaahambihiyaatimaahē. Owe. Sahi aimi noaipapi Autaahaatihomi manyinya nususasamihiyaatimatawaaoyopo. <sup>20</sup>Sahi aimi noaipapi Autaahaatihomi añañamataiwihiyaate, ko taati añañimatisañaño. Nyahi aposerihyaanini komi piwiha otipipati nesi ausawaati kiyohiyihyaanangisuni ami Autaahaatihomi piwiha atiwi nepi ausaahohiyihiyaisuni sañi añañami yasiha watipihamatiya neti minyihondaise. Aihini ami Kiraisi Jisaasihoni sañi añañi titihini anitisati isiwatitandi yasiha jiha anaahiha watipihamatiyahore. <sup>21</sup>Aihini sandi añañi nahandi Kiraisihomiheti nausanati bindataise. Aihini ami Autaahaatiho taati sandi añañi añañimatihi naihini kandi taati awaindindaise. Awainditati titihini Awaisihomi añañimatihi bindataise. <sup>22</sup>Ami sangisangi Kiraisihoaisawii timaamaitiwi komiheti nausaniwi bimauhi ami Autaahaatiho komi isihyaani ususaanangi komi Itipihoni Gaahomi otipipata neti maasi ahonyisataise. Neti ahonyihini nyahi noaipawaati komi añañi akañañamatiyaahiyaane. Ami Autaahaatiho komi Itipihoni kañi añañi nandaati bindataise.

### **Porihoni Isihya Judaahiyaami Dawaapipihiyai Piwiha Gaaha Waniha Ausaati Kaunditandihomatataise**

**3** <sup>1</sup>Autaahaatiho sangi gaahati kasindimandapi nini Porihonini sahi Judaahiyaami dawaapipihiyaatapi Kiraisi Jisaasihomi otipipati sangi jatatananiti anditisaiwitandihati kiyohitihandapi napwititi bindataayo. <sup>2</sup>Sahi nisapi aimi atisopo, Autaahaatiho ningi gaahati kanisati komi otipipati sapi kaitandihati nanimipatapo. <sup>3</sup>Saiwa Autaahaatiho kaiwaiwaapihi piwiha jihura noasandisihare. Siyati noasandisihandaahandi kandi Autaahaatiho sawaho neti ausaimanati ningi neti auta nanisataise. Aihini ko nanisimbipaapi nini wonya masihonya aimi kasatataato. <sup>4</sup>Sahi piwiha kima

awitiwi mmonawaawi saiwi sahi gwinyaitaapo. Kiraisiho otipipati kaiwaiwaapi piwiha jihura noasandiwaiwaapi nini nga baindi mmoniti ginunyaatataise, ami ningi Autaahaatiho neti nanisihohi. <sup>5</sup>Jihura suraahi piwiha komi gwinyaasiwaiwa komiheti noasandiwaiwaapi Autaahaatiho isihiya suraahiyai windi ausaati nunjati kamundise. Owetise. O ami wani kimuraahi komi Itipihohi Gaahora nyahi ko natanyoasisawihiyaanangisuni ami komi piwiha atiwi nepi ausaahohiyihiyaisuni Autaahaatiho komi piwiha noasandiwaiwa neti ausaati ausaimanati nanyisatataise. <sup>6</sup>Piwiha noasandisihohi siyate: Piwiha Waniha Gaahaara sahi isihiyaati Judaahiyaami dawaapipihiyaati napiwi nyangisawi maasi timaamaitauhi ami sahuni nyahuni noaipawaati nehi isihiyaami naasiyaanimataati ami nyami ambipati noaipati nehi naasaipihindaise. Aihohi sahi ami nyahi Judaahiyaanisawihohi maasi Autaahaatiho nyangi gaahaiwa kanyiwaiwa nehaayo. Iyataati saiwa gaamaiwa sahi Judaahiyaanami dawaapipihiyaati nyangisawihohi maasi taawi nehohiwimaiwa nyangi kanyisati nanyamitandi jihohi watipitahi Autaahaatiho katiwaiwa wani sahi Kiraisihohi Jisaasihohisawihohi maasi timaamaitotihandaahohi sahi newaayopo.

<sup>7</sup>Autaahaatiho ningi nini gaahapa wapa windi kamaindi nehohihandihohi gaahandihohi kanisati ami komi watipihandihohi anditiniwati nanimihanati ahinihohihonine, komi piwiha waniha gaaha awusaitando. <sup>8</sup>Nini Autaahaatihohi isihiyahohi nahatiyaami apipaahohi ipotihohihonine, ami Kiraisihohi isihiyahohi jihura neti titi nusopisatihohihoniniso. Setahoninitihohihandihohi kandi ami Autaahaatihohi ningi gaahatihohi kanisatihohi otipipatihohi naninyataise. Ami sati otipitihohi isihiyahohi nyahi Judaahiyaanami dawaapipihiyahohi piwiha gaaha ausaati kaunditandihohi naninyataise. Iyataati sa piwa gaaha wana Kiraisihohi gaahaiwa nyahi ko gaahohi sanahihohi, taati nehohiwimaiwa nahatewaapi katahaare. <sup>9</sup>Autaahaatihohi wuwanihura kahapaamapipa nahataapa kiyatihohi ahiyataise. Iyatihohi ko ipotihura kaitandihaiwaapi gwinyaasiwaiwa ko sawahomihohi noasandataise. Siyatihohi noasandiwaiwa ningi neti wani nanisatihohi ami otipipatihohi naninyataise, isihiyahohi nini piwiha kaiwa jihura taahiwaiweti noasandiwaiwaapi ausaati iwinjapwaati kaunditando. <sup>10</sup>Ko jihura komi gwinyaasiwaiwa siyatihohi noasatatihaiwa kaiwa wani komi isihiyaanangihohi neti naasiyaanenyamatihohi ahonyisatihohi ausaimanataise. Ami ko amitiha gaaha gwinyaasiwaiwa taahiwaiwa kahatamatipetihaiwa yamihapataatihohi watipihohi watipihandisahiyauni ami itipihohi wiwa watipihaiwauni mmondaatiwo. <sup>11</sup>Jihura saiwa ipotihohi kaitandihohi Autaahaatihohi gwinyaasiwaiwe. Gwinyaasiwaiwaasi ami Jisasi Kiraisihohi nyangi nyainjatisihohi Awaisihohi otipipatihohi kaipatetapi ko aimi wani kaiwa kiyataise. <sup>12</sup>Nyahi Kiraisihohi aimi biyaati giwunyaahaayo. Isi ko Jisaasimohi nyangisohi nanyamaasi Autaahaatihohi apihohi niyonihohi nyahi windi



yamaayaati nanihiyaati Autaahaatihooapihi deti komihini naitihaawe. <sup>13</sup>Isi nini sangisi sandi kasatitaano: Nini sapi otipipati Autaahaatihomi kiyonihi kandapi nini naanati yaasihandi neti napwititi bimotihandapi waati pihitiwi gimunyaapise. Pihitiwi sahi gwinyaahohitihandi windi yatihimitane. Owe. Ningisi naanihaiwa nanoaipasiwimaiwaapi sahi nehi tihaapaiwi maaritiwise. Sandi ningi nanoaipasitimandaahi ami sangi Autaahaatiho japihi taati nasamaati jatatamanati neti naasiyaatesamataise.

**Epesaasihiya Andititiwi Bitoaitaatiwi Poriho  
Autaahaatihoai Piwaundataase**

<sup>14</sup>Nyami Apiho yamihapataatihi bimisihoko siyati apipaahi amitiha gaaha gwinyaasitihandaahi nyangi neti ambipati naasapateti nyamaamahiwati kaiwimaiwa saiwaapi gwinyapenataati, ami nini kopi nisi atotipati maiwi ipesati atotipiwesati gaapundataayo. <sup>15</sup>Ko sawaho nahatiya yamihapataatihi bimohiyihiyaisuni ami yapipataapihi bimohiyihiyaisuni kiyati ahiwisiho Sapihore. Sapihosi ami ko sawaho nahatiya yamihapataatihiyaisuni ami yapipataapihiyaisuni ambipati nusoasati nisi manyinyaate, undati ambihundataase. <sup>16</sup>So nyami Apiho apipaahi gaahaiwa taahiwaiwa sangi nasamitandi namihanati timanati ahiyataise. Isi ko komi Itipiho Gaaho sami maariho omanjitihi tisaahiwati gaamati nasamitaise. Nasanyati sangi neti watipisamati anditisaiwitaise, sahi noaipapi daahi watipitiwi anditititaatiwo. <sup>17</sup>Ami sahi kopi giwunyaahohitihanda Kiraisiho nasati sami omanjitihi bimitandi nini gaapundataayo. Iyonihi ami sahi isihiyai maariho numwitaatiwhandi waati awaindi anyaati sami omanjitihi noaipahonihi ami sahi isihiyai maariho akitinihi numwisaihi kandi noaipati sami omanjitihi watipitati ahotitando, ami ipatami damipati tamirihiri mihatihi yapipataatihi notaati ipati neti titihiwati isiwatihi titihi watipihati ahetipatamataiwi watipihyaati bitoaitaatiwo. <sup>18</sup>Iyataati ami nini Autaahaatihomi titihi isihiya usa nahatiyauni Kiraisiho nyahi isihyaanangi apipaahi aungwohandi awaindihandi komi maariho nanyamindihandi baiwi akiti akitinihi mmoniwi biyati nga sangi gisunyaatati jainjapwaatamaitando. Ami Kiraisiho komi maariho nyangi nanyamindihandi apipaahi awaindihanditati, ami apipaahi utarihanditati, ami apipaahi mihaati niwaatihanditati, ami apipaahi mihaapi baahi tongihanditindihandi sahi nga baiwi mmoniwi jainjapwaatitendo. <sup>19</sup>Ye akite! Kiraisiho nyahi isihyaanangi komi maariho nanyamindihandi apipaahi awaindihande. Awaindihandisi nyahi isihyaani kandi biyaati windi mmonaati gwinyaawaati, ami windi biyati nga namaanyesipataise. Setihihandi kandi ami nini sapi gaapundataayo, ami sahi kandapi nga mmoniwi gisunyaatitendo.

Siyati sangi gisunyaatonihini ami Autaahaatiho sawahomiheti komi watipihaiwa ami ko bimindihandi tisaitati gaamati ahotimbipa kapa nahataapa samihetisangi tisaitati gaamati ahotitando. <sup>20</sup>Autahaatiho gaahore, koai niwimaitihaawo. Sawahomi watipihandi nyamiheti kaindihandaahi Autahaatiho nyahi wapa nga kaitihaawi nyahi gwinyaawaati ami wapa kanyitandi nunjenohitihandi nusatipihaati autaahi wamwaanji awaindihandi neti anditinyiwataise. <sup>21</sup>Isi Kimiko sanyisimoai isihyaani nahatiyaani Kiraisihopi giwunyaawaati koaisaati timaamaitohiyihyaanini ambipati awaipati nunyaati mepi autahewaumwaitihaawo. Iyaati wanimuraahiyaanuni ami ipoti ipotihuraahiyauni nasisoaari ambipati awaipati koai nunyaati mepi autaa hemwaitihaawo.

**Nyahi Kiraisihopi Giwunyaahohiyihyaanini  
Komi Ambipatamihyaanine**

**4** <sup>1</sup>Nini Porihonini Awaisihomihoninindi ami komi otipipati kawisonihini kandapi nepi nanipuhauhi nini napwititi bindataayo. Autahaatihoai nuwipinjawi komihyaatimatitaatiwi sangi nasisenati gaasatihihyaatitihini ami kandapi gwinyaawaati nini watipindi sangi sandi kasatataato: Sahi Autahaatiho maaritati gwinyaasirihireti japelihiriwi daiwi bitopi bimaawise, satataato. <sup>2</sup>Kiraisihomi isihya usaami asimwaatitihini sahi nasisoaari yatihini ipatisaniwi bimaawi, ami kiyai piwiha napaisaatundiwi napaisaatihapa kawiwise. Wapa titihimetihapa sangi kasisalihiyai keti wihoanijihandi kiyai kawitaatiwi sangi windi apomaasane. Sahi ninaasiyaati sami maariho kiyai nunyawini naminiwise. Aiwi kiya sangi naanijihaiwa nasanyohiwaiwa nepise. <sup>3</sup>Sangi Itipihoni neti sami maariho ambipati yatihisiwati napaisaatismati wirihiraahamatiyati wisaisasati jaiwatataise. Isi ami sikireti sahi kaiwi bimaawise. <sup>4</sup>Nyahi ambipati nehi naasaipatamihyaane. Iyataati ami Itipihoni Gaaho Naasohihini nyahi ambipati nehi naasaipatamihyaanamiheti bindataise. Ami kimikiyati windi nehi naasaindihini naitihaawi jatitihawo Autahaatiho gaatati nanyamaahiyaane, ami nyahi siyaanitimi naisaihi ami ko gaahapa kanyitandi gwinyaasipipa kapa nyangi kanyisati gaamati nanyamitandoo. <sup>5</sup>Ami Awaisiho (nyahi komi isihyaanangi nyainjatisiho) nehi naasohihe. So Kiraisihore. Iyati ami daihira nehi naasairaapaahihi kimiko Kiraisihopi giwunyaahaayo. Iyaati ami kimiko utaaho naasomi ambipata waapoho nehaayo. <sup>6</sup>Iyataati Autahaatiho nehi naasohihe. Iyati ko nyahi isihyaani nahatiyaanami Apihore. Iyati ko Awaisiho isihyaani nahatiyaanangi nyainjatisihore. Ami ko nahatiyaanamihetapi gaamati otipipati kiyati, ami nahatiyaanamihatihini gaamati bindataise. <sup>7</sup>Kiraisiho komi apipaahi gaahapa awaimbipa wapa nehi nyahi ninaasiyaanangi titihini yawanaanapihapa nawiho owehapa nehihapa nanyinyataise. Ko

siyati komi gaahandi nehihandi nyangi nanyamindimandi ami ko satati, nini apipaahi gaahonini iparihonine, nyatati nyami maarihopihapa nyangi nanyisataise. <sup>8</sup> Aihi ami sikandi Jisaasiho kaindimandapi Autaahaatihomi piwihaatihi wapihi satati jipatipindise. “Ko autaahi mihaati niyataati isihya apipaahi taahitihandi wirisandihandi tunnati yahwinati numwaasawihiyai numwaasi niyataise. Iyati ami ko isihiyai gaahapa nawiho owehapa nehihapa komi otipipati kawitaatiwihapa nunyataise”. <sup>9</sup> Kima piwima satisima, “Ko autaahi mihoti niyataise,’ tisma satatise. Kiraisiho jihinihi kimaapi yapimbataapihi nasati ami daahi mihaapi kimati yapimbatami nyepepi noatipati notaise tatise. <sup>10</sup> Ami ko yapipatami nyepepi noatipasiho ami naasiko tuwipati nahataapai mitaahemati mihaati yamihapataatihi niyataise. Ko siyati kaindimandi ami komi watipihanda nahataapai neti titihemati gaahapemahonihi, ami kapa noaipati titihitati gaatati nahataapihi komi ndiheti ahotitande. <sup>11</sup> Kimiko komi otipipati kawitaatiwi isihiyai gaahandi nehihandi kawisati neti anditiwuwati ami otipipati kihati kihati nunyataise. Nunyati usaisi komi otipipati kawiwu piwiha awusoaitaatiwi namihanati natausaasataise. Ami usaisi otipipati komi piwiha katonihati atiwi nepi isihiyai kaunditaatiwihati nunyataise. Iyati ami isihya usaisi daiwi otipipati komi piwiha gaaha wanihaapi isihiyai kihapihi kihapihi kihati kihata ausaapi kaunditaatiwihati nunyataise. Iyati ami usaisi Kiraisihomi isihiyai iwinjaawitopi anditiwipi ami komi piwiha gaaha wanihaami baahi mihaapi awaiwaiwaapi isihiyai katiwunjutaatiwihati nunyataise. <sup>12</sup> Kiraisiho otipipati gaahaiwa saiwa nyahi komi isihyaanini nawihiyawa otipipatami akipipaisaati kawitihawu Autaahaatihomi isihyaanangi neti nyamanati nanyinyataise. Siyaati nyahi komi otipipati kawisihaawi ko Kiraisihomi ambipati naasaipitamihyaanini noaipawa watipitihawu. <sup>13</sup> Komi otipipati kimati katinihati kaimi nowaati nyahi nahatiyaanami kopi giwunyaahohitihandi naasindaatihi nandaawa timaamaitaati, ami nyahi Autaahaatihomi Mwaahopi gwinyaahohitihandi nehi naasaindindi kandi newaati gwinyaawaati mmonaati ami kopi biyati nanyesipatamahonihuraatitendo. Iyaati nyahi noaipawaati utaaho aima gwinyainjhomatiyaati nyahi nyami Kiraisihopi giwunyaahohitihandi noaipati apipaahi watipitati ami titihi ngaatitendo. Siyati titihitati gaatonihati ami nyahi nyami Autaahaatihopi giwunyaahohitihandi Kiraisiho sawahomatiyaati noaipawaati ami sawaho titiho gaahotirihireti noaipasaihuraatitendo. <sup>14</sup> Ami siyaati noaipahaawi nyahi windi manyinya sangihyaamatimetitihawu. Iyaati nyahi kopuho wo gwiharaaho usaayaho durihiraatihi mbipa itipihoko koai nesi kihihooanemasihini noti nasataipamatimaitihawu. Isihya atipati isihiyai nawihaiwi jaipipa jaipaiwi nusepaapihaiwa kaiwunjohiyihyaamihireti siyati noaipataise. Isi kiya saiwi kiyohirihireti

isihiya kiyaami giwunyaahohitihandi sangi watipitahiyai wirapi aisi niyohirihira nyahi windi namutihaawo. <sup>15</sup>Nyahi piwiha jaipitiha siyaha windi atihomitihaawo. Ami isihiyaisi maariho akitinihi napaitaati nunyaati ami kiyai piwiha nehi akitihaahihi kaunditihaawo. Siyahaawi nyahi noaipawaati watipihyaanimataati, ami nyangi jihimatati nyainjatisiho Kiraisihomihini deti niyaati koaisaati maasi timaamaititihaawo. <sup>16</sup>Kiraisiho jiho mitiho ambipati nahandi ko jatataise. Ko siyati jatihi ambipatami wihoaañihapa ikwauhiri ndiha atihiri mitiho ambipati nahotaaha usetiho kateti ikwihati bindati anitisati timaamaindataise. Sapa ambipati nawipipa siyati bitati ahotati neti ambipati nehi naasaipihemasihhi ami ambipati noipati naasaipihindaise. Iyati ami atitati usetiho anditatu ahendaati ambipati neti anitisati titihi isiwatataise. Sapa atitatu gwititihu usetiho anditatu mmati nisihoapo isiwatatu otipipatu atipatu werihiri ambipati nunyataise. Nyahi Kiraisihomi ambipati naasaipitamihyaanini sireti siyati nehi utaamo ambipati otipipatu kairimiretamatiyaati nyahi maariho naminaati ambipati Kiraisihomi naasaipatamihyaanini waati taahiyihyaanini noaipawaati watipitaati bindihaayo.

#### **Giwunyaahohiyihya Kiraisihomihiri Wanihireti Japepihiriwise**

<sup>17</sup>Nini Awaisihomihoninisi ami komi watipihandi sahi sami jihu jahirihiretapihaiwa kamaitaatiwi piwiha watipihhi kasatitandiyo. Isihiya Autaahaatihopi namusesipatatu ami kopi windi gimaawunyaapihyaami kiyohiwaiwa sahi windi kamaiwise. Kiyaami gwinyaahohiwaiwa nehihaiwe. <sup>18</sup>Kiya windi moniwihiyehi. Aiwi ami kiya atitaatiwi pohiyyawaayowo. Aiwi kiya Autaahaatiho komi isihiya wanihira gaahireti bimitaatiwi numwindihandami ipaahaapi bindawaahiyaare. <sup>19</sup>Aiwi kiya kiyaami maipihaiwa kiyohiwaiwaapi mamaawahiye, ami nehi nanihaiwi waaki maipihaiwa kaiwihiyehi. Kiya kiyaanihi nasisoaari ami mwitetiwi maipihaiwa kihaiwa kihaiwa kahatamatipetahaiwa kaitaatiwi maariho nusoaasawi apipaahi maariwimapi kaiwihiyehi. <sup>20</sup>Ami Kiraisihopi sangi saiwi sireti katiwisasawaamaayopo. <sup>21</sup>Sangi aimi Kiraisihopi piwiha katiwisasauhi sahi aimi atisopo. Aihhi ami ningi aimi ginunyatataise. Piwiha Gaaha Wanihaami piwiha akaaha Kiraisihopitiha aimi sahi atisohihaapi isihiya aimi katiwisasopo. <sup>22</sup>Sahi sami jahirihireti namaitaatiwi aimi katiwisasopo. Maipihaiweti jihu daiwi bimohitihandi ami isihiyai nahariho numwindihandi namaitaatiwo. Maariho jahihomihaiwa noipatu daahi apipaahi maipindaise, ami kaiwa kaitaatiwi isihiyaisi neti aisi notaiso. Aihhi kaiwa kaitaatiwi isihiya maariwimawaayowo. Iyauhi kaiwa kiyai daihira asira nosasindaatiwihira numwaasi notaise. <sup>23</sup>Ami sangi aimi katiwisasopo, sahi maariho waniho asoho naitaatiwo. <sup>24</sup>Aiwi sahi utaaho waniho asohomatawi noaipaitaatiwo. Sangi Autaahaatiho neti wanihiyaati

asiyihyaatesamataise, ami sahi noaipapi Autaahaatiho kiyati ahisisiho sawahomataiwi apipaahi gaahiyaatimatiwi, ami sahi nehi sawahopaahaiwi titihi ko sawahomihyaatimataiwo.

<sup>25</sup>Isi sahi piwiha jaipipa katiwi kamaniwise. Nehi piwiha akitihaahihi sahi ususaati kaniwise, ami nyahi nahatiyaanini ambipati nehi naasapiti Kiraisihomihatamihyaaniso. <sup>26</sup>Sangi windi apomaasane. Ami sangi aposonihi wiwa sahi maipihandi kaitaawi jaawo. Ami sahi jaawo. Wiwa sangi aposindihandi kandinihi ahotimi niyonihimi ami sangi taati kiyatangisinihi aposami niyonihimi wiwa ipiho noti namaatipaitaiso. <sup>27</sup>Sahi Bwaasirihiri utaahe maipihoi niwupwaapi kopi maasomwaaŋi windi namaawupwise. Niwusaihi sangi neti japatitaiso. <sup>28</sup>Isihiya taawi ikonohiyihya kiyaaami ikopa namapise. Namaposawi kiya sawanaami ikwira otipipati kaiwise. Kiya itatamaniniwi bimitaatiwihapa kiyai kaiwi nepise. Ami kiya siyawaawi kiya wapaisahiyaatiwi ami kapa wapa isihya anditimitiwi ami kahapaamapipa owehiyai nunyawwi iwatatamanitaatiwo. <sup>29</sup>Sahi piwaatawaahura piwiha isihiyai yaawati apowati neti kiyaaami maariho omanjititihimi nusopisasinaha kamaatiwise. Ami nehi piwiha gaaha isihiyai kiya gaahireti daiwi bimitaatiwihaahihi ami kiyai anditiwuwati iwatatamanitandihiretapiha katiwise. Saisaihi ami sami piwiha isihya atisohiyihiyai gaahati kawitando. <sup>30</sup>Sahi Autaahaatihomi Itipihoi Gaahoi naŋati yaawati mimaipiwimatihandi namunyawwise. So Itipihoi Gaaso sangi sasatati, “Sahi aimi titihi Autaahaatihomihyaate,” sasatati neti nasisataise. Iyati ami satati Autaahaatiho sangi apipaahi kiyatangisinihi ipotihandi nasamaitandi nasamihainjihyaatisi kura noaipahonihimi sangi nasamaitaise, tati kasatati samihatihimi bimitandi Autaahaatiho ahiwihihore. <sup>31</sup>Sahi sami omanjititihimi windi nasinaamanati ami aposati ami maipitiwi itihimaatiwise. Apopipaisawi waapihitiwi itihitiwi isihiyai yaawihandi nunyawwi konyahimaatiwise. Maipihapa apipaahi windi kamaiwise. <sup>32</sup>Windi samaiwi ami sahi ususaati gaahati kainiwi maariho naminiwise. Aiwi sami maipihaiwa Kiraisihoetapi Autaahaatiho nesamasipatamataiwi ususaati sami maipihaiwa nemapise.

#### Nyahi Nausainjitihandeti Daayaati Bimitihaawo

**5** <sup>1</sup>Autaahaatiho sangisi maariho apipaahi waati awaindihandi nasanyahiyaate, ami sahi komi manyinyaatitihoi. Isi ami sahi komi manyinyaatisi ko Autaahaatiho kairihiri kireti mmoniwi japepihiriwi kaiwise. <sup>2</sup>Aiwi ami sahi apipaahi akitinihi isihya usaisi maariho nunyawwise, ami Kiraisiho nyangi apipaahi akitinihi awaindihandi maariho nanyinyataati komi ambipati Autaahaatihoai nunyainjipatamataiwo. Iyati ko komi ambipati nyangi nyatatamanitandi nandapa kohasipihoi waamainjotati jipiyahapa ko maaritati nehapa Autaahaatihoai tihimi nunyohipatamatiyati nunyainjipatamataiwo.

<sup>3</sup> Sahi Autaahaatihomi isihyaatisi isihya namaatotihandami ipaahaapi usihya ami asihya sami siwoyaametati ami siwaasiyaametahiyaisawi sami ambipati naminiwi windi timaamaamaipise. Aiwi ami wiwa ainjotahaiwa isihya kamaayohiwaiwa suhiramataiwi kamaiwise. Aiwi ami kahapaamapipa usaamihapaapi sangi windi akimaasisane. Aiwi ami sahi saiwaapi piwiha nehi masihonjisangi samihatih nesi kaniwi mbipaara nesi sangi atihomisamati namoaipane. Apipaahi owetane. Saiwaapi piwiha Autaahaatihomi titihi isihya kaniwi katitaatiwihyaametiso. <sup>4</sup> Isihya asihya ami usihyaami ambipatapi mapipaisahaiwa sahi windi kamaatiwise. Aiwi ipipa maatimaatitwi asihyaami ambipatapi piwiha kamaatiwise amitiha owehiya naharihiyaamatitwo. Saiwa Autaahaatihomi titihi isihyaami katitihawwi titihimahe. Ami nyahi nehi kimikaiwa nanyamisiho Autaahaatihoi gaahireti gwinyaawaati kopi yapipaisaati koai saundaati, 'kinyi gaahonji iparihonge gaare,' unditihawe. <sup>5</sup> Sahi piwiha kimaapi baiwi mmoniwi gwinyaapise. Isihya usihya asihya apwaatiyaametahiya kihiyaisawi ambipati timaamaitohiyihyauni, ami asihya usihyaami ambipatapi piwiha mapipaisihaiwa katohiyihyauni, ami isihya usaamihapaapi akiwisawihya nehi kiyai sawanaapihapaapaahaiwimapihya, ami kiya saiwai nepi jaipitaho autahaatihomapi kopi gaapundiwi mepi autaahepumahohiyihya Kiraisihouni, ami Autaahaatihouni komi isihyai gaahaiwa aimsi nunyati kaihi nepi isiwatiwi kiyaamihaiwaatiwaiwa nihirinati owetitaise. <sup>6</sup> Sahi baiwi jatiniwi bitopise, ami wiwa piwiha maiphapa nehihapa windi akitihapaametihapa sahi maiphaiwa kaitaatiwihiretapi kasatitaawo. Ami sandi nini sangi taati kasatohiwimaiwa kaiwa isihyai katiwi kiyohiyihyaamiheti Autaahaatihoi apowindahandi ahondaise. Isi ami isihya saiwa kaiwi komi piwiha nepumahohiyihyai tipitapaati usondandihyaatihisato. <sup>7</sup> Isi ami sahi isihya saiwihiyaisawi maasi timaamaitwi dahomaiwise. <sup>8</sup> Jihura sahi asihatindhandaatih bimambiwihyaate. Asihatindhandaatih bimauhi ami wani Awaisiho nasamaati nausainjitihandeti neti ahisihi bindawaayopo. Isi sahi noaipapi nausainjitihandamihyaatimatiwi kandi nausainjitihandeti daiwi bimaawise. <sup>9</sup> Autaahaatihomi nausainjitihandaatih daimbi bindapaapaahi ami katami nandapa akipipa siyahapa noaipaitaise. Apipaahi titihaiwa ami apipaahi gaahaiwa ami titihi akitihaiwaahihi noaipaitaise, ami saiwa titihi nausainjitihandamihaiwaaso. <sup>10</sup> Sahi sami anditati napamapi Awaisiho kopi giwunyaahohiyihya gaahaiwa kaitaatiwi gwinyaati maaritiwaiwa mmoniwi nepi ami kaiwa kaiwise. <sup>11</sup> Isihya apipaahi maiphaiwa kiyohiyihiyaisawi maasi kiya kiyohiwaiwa sahi windi kamaiwise, ami saiwaahi asahatinditihapihaiwaaso. Iyati ami saiwa isihyai iwatatamanitandihapa akipipa apipaahi owehaiwaare.

Ami saiwa maipihaiwa asahatinditihapihaiwa sahi nepi autemapi isihiyaami ndiheti auta ahiyawise. <sup>12</sup>Nini isihiya maipihaiwa noatiwi noatihepi isihiya usa maawinjihauhi kiyohiwaiwaapi windi kamaatito, ami saiwa mapipaisihaiwaaso. <sup>13</sup>Saiwa maipihaiwa noasawi isihiya kiyawaasohiwaiwa ami nausainjitihandi neti autemahonihi kaiwa apipaahi maipihaiwaatanihi isihiya mmoniniwi namaitaapo. <sup>14</sup>Wapa apipaahi maipihapa nahataapa nausainjitihandi ausaimanimbipa kapaanihi owetitaise. Ami kimandi saindimandapi piwiha aimi wapihi satati jipatipindise:

“Nanopotingihonye nepape. Napopi ahotingihonye kinyi animwaahipati namasi nepape ami Kiraisiho gi nangusaatito,” tati jipatipindise. <sup>15</sup>Isi sahi daayoheteti bimoheteti baiwi jaawi jatiniwihyaato. Amitiha gaaha gwinyaapihiyaati bimaawise. O amitiha owehiya nahariwihyaamihamaani bimimaawise. <sup>16</sup>Wani kimura asisiha apipaahi maipihura bindihaayono. Isi ami sahi asisiha wa namihiriwi ami asisiha nahateweti Autaahaatihomi otipipati nepi tisaipi mmoniwi nepi kaiwise. <sup>17</sup>Isi sahi nahiriwi amitiha gwinyaitaatiwhandi owehiyaamatimaiwise. Awaisiho Jisasi Kiraisiho sahi wapa kaitaatiwi maarititi gwinyaasipipa daapi mmoniwi nepi kapa sahi kaiwise.

<sup>18</sup>Sahi waapoho wainihandi pihitiwi windi namaaniwise, ami waapoho wainihandi sandi sangi neti nasopisasitaiso. Ami nehi Autaahaatihomi Itipihō Gaahohi sahi pihitiwi nepi samiheti tisisaitane. <sup>19</sup>Autahaatihomi isihiya usaisawi piwanawaahura aunihihiri aunihihirami utipihoaatihi ahotirihiruni, ami Kiraisihomi isihyaatami aunihihirami utipihoaatihi ahotirihiruni ami aunihihiri wiwa Itipihō Gaaho sami omanjititih neti gisunyaahonihiruni nepi sami piwihemapi ahoyaniwi aunihiwi piwaniwise. Saiwi nepi sahi sami maahomwaanapuni ami sami maariho omanjititihapuni Awaisihoai aunihuriwi aunihiwi komi ambipati mepi autaahepumapise. <sup>20</sup>Aiwi ami nyangi nyainjatisiho Awaisiho Jisasi Kiraisihomi ambipataahi nahataapa sangi nasoapisipapaapuni ami nasisoaari nyami Apiho Autahaatihoi, “Kinyi gaahone gaare” undiwise.

### **Apwaataatuni Ami Warihouni Kiraisihopi**

#### **Giwunyaahohiyihyaamihireti Bimitaatimihandapi Porihō Kandaase**

<sup>21</sup>Aiwi ami sahi Kiraisihopi Awaisihoe tiwi koai nepi autaahi isiwatiwi ami komi asimwaatitih piniyohipatamataiwi Kiraisihopi giwunyaahohiyihyaati ususaati usaami asimwaatitih pinuwise. <sup>22</sup>Sahi asihyaate, sami siwoyaami asimwaatitih pinuwise, ami sahi Awaisiho Kiraisihomi asimwaatitih piniyohipatamataiwo. <sup>23</sup>Ami nini sandi katotimandi apaapimaato. Woho so apopaati apwaataatami jiho mitihore, ami Kiraisiho isihiya kopi giwunyaahohiyihyaami mitihomatiyato. <sup>24</sup>Isihiya kopi giwunyaahohiyihya siya Kiraisihomi ambipate. Aihī ami Kiraisiho kiyai japihi numwaataise.

25 Warisaate, sahi baiwi napaitiwi maariho sami siwaasisai nunyawise, ami Kiraisiho komi isihiyai maariho nunyataati kiyai iwitatamanitandi komi ambipati ipi titihi atawihateti nunyainjipatamataiwo. 26 Ko komi isihiyai Autaahaatiho numwaitandi ko sawaho Autaahaatihoai nunyanataise. Kiraisiho piwihaaraahuni ami waapohoraahuni komi isihiyai baawusati popitumataise, ami kiya noaipapi komi ndiheti maipihandami kipati atiha atataaha, ami tataipati owetati titihi gaahiya popitihya apopaati apwaimaamaati sitihiri ahotati wenjhaati namaatitandi timetisaamaatamataiwihya noaipaitaatiwo. 27 Ami kiya setahiyaataawaawi ainahiyihya maipihapaami kipi atiha owetati ami wapa mimaipimetahya apopaati apwaimaamaati wenjhaati namaatitandi timetisaamaatamataiwihya komi ndiheti noaipaitaatiwo. 28 Isi ami sikireti sahi usihyaati sami siwaasisai maariho nunyawise, ami sahi sami ambipati maariho nunyohipatamataiwo. Woho komi apwaataati maariho numwisihoh so ami ko sawaho maariho naminahore. 29 Utaaho wo komi ambipatapi pohipiyati kati neti nopisasataamaise. Owetise. Ami Komi ambipati nandapa nunyati biyati itatamanati jatataise. 30 Ami sandi nini apaapimaato, nyahi Kiraisihopi giwunyaahohiyihyaani komi ambipatamatiyaahiyaaninitihito. 31 Iyataati ami sandi nini apaapimaato, Autaahaatihomi piwiha wapihi satati jipatipindihito:

“Ko woho komi saniyi sapiyai namasi noti ami komi apwaataatisati timaamaitataataahi kasanyuri nehi utaaho naasomataimi noaipamaise,”

tihito. 32 Kima piwimaatihi siwipati apipaahi awaipati noasandataise. Aihhi nini kima piwimaapi saindi Kiraisihouni ami komi isihya kopi giwunyaahohiyihyauni timaamaitiwi utaaho nehi naasomataiwi noaipahohirihiretapi kandaase ndi nini mmonataayo. 33 Iyataahandi kandi kima piwima sahi usihyaati nehi ninaasikiyaatapi kandaase. Ami sahi nehi ninaasonji kinyi kiwaamaati kinyi kiwahoŋi maariho naminihingipatamataimbi akitinihi numwitaapo. Aisaihi ami asihyaati nehi ninaasaamihhi kaatami warihomi piwiha atiwisati komi asimwaatitihhi sanoti ami koai kaati neti autaahi isiwatane.

#### **Porihoh Manyinyauni Saniya Sapiyauni Bimitaatihiretapi Piwiha Kandaase**

**6** 1 Sahi manyinyaati sami siniya japiyai atiwihhi kiyaami asimwaatitihhi pinuwise, ami sahi Awaisihopi giwunyaapihiyaatiso. Ami sahi sandi saiwi kaitaatiwi Awaisiho maaritati titihi gaahande.

2 Autaahaatihomi piwiha utipihooatihhi satati jipatipindise:

“Kinyi kinyi kinyi gapiyaami asimwaatitihhi pinumbwi ami kasanyurami piwiha baimbi atiwimbi japepihirime,”

tati jipatipindise. Iyataati kimba winihapipa jihapaare. Iyataati kapaami wapa akipipa noaipaitandi piwiha watipitati katahaapihaare. Ka piwa akitinihi watipitati satati jipatipindisihaapito.



3 “Kinyi saimbi kiyapaapaahi kinyi otipipati wapa kinyi kaingipipa titihi nga noaipati ami kinyi yapipataapihi nga baimbi utaarhandeti bimitaise,”

tati jipatipindise. 4 Ami sahi sapiyaati sami manyinyai kiyaami maariho omanjititih nepi nusopisasiwi apowati, ami sapi apowitandihaiwa wiwa kamaawiwise. Ami nehi Awaisiho mmonataati gaatitandihireti titihpumapi, ami Awaisihomihaiwa kiyai sahi nunjawwi ami komi piwiha winihundiwi katiwunjawise.

### **Porih Otipipatihyaapuni Iwinjatohiyihyaapuni Piwiha Kandaase**

5 Sahi nehi otipipatihataati nawiho namepi otipipati nehhati kiyohiyihyaate, sangi jainjatohiyihya kimaapi yapipatambihyaami piwiha baiwi atiwiwi yaiwi, ami kiyai nepi autaaahi isiwatiwi, ami maariho gaahoaisawi kiyaami asimwaatitih pinuwise, ami sahi Kiraisihomi piwiha baiwi atiwiwi komi asimwaatitih pinutataiwo. 6 Sahi sandi sangi jainjatohiyihya deti bitopi jainjasaihi kiyaami ndiheti kiya sangi gaahyaate satitaatiwihireti windi kamaiwise. Sahi Kiraisihoai atiwiwi komi asimoaatitih pinyohipatamataiwi Autaahaatiho maaritimbipa sami maariho nahatoaisawi kaiwise. 7 Sahi sami otipipati maariho gaatonih nahinahitiwi kaiwise. Aiwi Awaisiho sawahomi otipipati kawisihaayono tiwi kaiwise. Ami nehi isihya usihya asihyaami otipipati kawisihaayo, tiwi windi kamaiwise. 8 Ami gwinyaapise. Utaaho wo ipatisanati otipipati nga kaisihoai Awaisiho wihoanhandi gaahandi numwitaise. Sandi utaaho nawiho nameti nehi otipipatihaoaisuni ami utaaho wo awaisiho womi otipipati nehhati windi kamaayahoaisuni ahoyati Kawitaise. 9 Ami sahi awaisawihyaati sami nehi otipipatihatima nawiho namepi kasisauhi iwinjatohiyihyaate, sami nehi otipipatihatimai gaahati kawiwise. Aiwi sahi kiyai wiwa yawihaiwa kaundiwi kamaawiwise. Gwinyaapise! Sangisuni ami kiyaisuni ahoyati jainjatisiho Awaisiho yamihapataatih bindataise. Iyati ami ko isihya nahatiyai naasaipiti kati kawisahore.

### **Pwisipi Yaipa Nahataapa Autaahaatiho Sangi Nasamimbipa Nepi Nipaatiwi Niyopi Isiwatiwise**

10 Nini sangi piwiha kima ipotih awaisiha kasatitandiyo. Sahi Awaisihoaisawi baiwi timaamaitiwi ko sangi neti watipisamahonih ami komi watipihanda watipitiwi bitosawise. 11 Autaahaatiho sangi komi pwisipi yaipati nasamimbipa nahataapa anitiwi isipi bitosawise, ami kapaaraahi utaaho maipih Bwaasirihirami jaipipa maipihapa tipindiwi nemaitaatiwo. 12 Ami nyahi nehi yapipatambi isihiyaisaati tunaati yahwinihamaayo. Sahi baiwi gwinyaapise. Nyahi itipih maipihapa watipihandisahapaisaatuni, ami wiwa watipihaiwa watipihandisahaiwa

kahapaamapipai autaahi tuwipataatihi jatiwaisaatauni, ami wapa watipihapa kimaapi yapimbataapihi isihiyai apatihamatiyahaiweti bimohurimura jatiwaisaati taawa tunnihaayo. <sup>13</sup> Isi saiwa sikiyahaiwaapi Autaahaatiho sangi pwisipi yaipati nasamimbipa nahataapa nepi baiwi isiwatawa jatiwise. Uta Maipihomi asisiha maipiha noaipahonihura kapaaraahi sahi tunniwi yahwindaatiwo. Saiwi tunniwi yahwiniwi ami windi yamaanihimapi yapipati aunahipati isipi kiyaatinihi kapihitoaitaatiwo. <sup>14</sup> Isi ami sahi andititiwi bitosawise, piwiha akaaha akitiha nepi sami yamepatamataiwi anitiwi wisasaniwi nipaatiwo. Aiwi ami sahi Autaahaatihomi titihi gaahireti isihiyaisawi piwaniwi daiwi bimohitihandi nepi wapa watipihapa kiriwipati neti nisapuhonihi ami wapa kiriwipati neti nopisasitotihapa tiwaraitandi namaasahohipatamataiwi sami kiriwipati namaasapi nipaatiwise. <sup>15</sup> Aiwi ami Autaahaatiho isihiyaisati maariho naasohitihipi piwaundati nahowindihandapi sahi piwiha waniha gaaha ausaitaatiwi nepi timaninihohitihandi sami asuipatamataiwi nipaatiwise. <sup>16</sup> Sapa nahataapa nepi isiwatawa ami kapaami tiwatihati sahi Kiraisihopi giwunyaahohitihandi sami matoaatipatamataiwi nepi niwewise, ami Uta Maipihomi samiheti sisiha tihwitisihaamatiyati yaipati yotiwaiwa katetapi tiwaraitando. <sup>17</sup> Aiwi ami Autaahaatiho sangisi japihi nasamaasitihandi sami tingaatihai ainihiramataiwi sami mitihoatihi nahato namaasapi nipaatiwise. Aiwi ami Autaahaatihomi piwiha Itipihoho Gaaho namatanaati timwipihanaati bainatihiramatiyahanaati nasaminanaati nepi pwisipati bainatihiremapi isipi gwisitiwise. <sup>18</sup> Itipihoho Gaaho neti gisunyaati ami anditisaihonihi Kireti Itipihomi watipihanda sahi nasisoaari windi ikinniwi namaamihaapi kiyaatinihi gaapundiwise. Aiwi ami Autaahaatihopi gaapipati kihati kihati andititiwi gaapundiwise, wapa sahi nausetitihipi naitaatiwi maaritohipipa nahataapaapi nunjeniwi gaapundiwise. Aiwi andititiwi jatiniwi timetiwito bitotawa gaapipati windi namaamihaapi ikimaaniwi kiyaatinihi gaapundiwise. Autaahaatiho komi isihiya nahatiyai iwitatamanati ami anditiwiwitandi sahi jaawi nasisoaari mwitewito gaapundiwise. <sup>19</sup> Ami sahi nisapisangi gaapundiwise, nini piwiha ausaati katitandi timetisanihura Autaahaatiho komi piwiha naninyati anditinihonihi nini windi yamaindi watipindi piwiha waniha gaaha noasandindihandi ausaimanitaano. <sup>20</sup> Autaahaatiho ningi komi piwiha kimika awusaitandi naninyati natanoaasihonine. Isi ami kimandi kandapi nini napwititi bindataayo. Sahi nisapi gaapundiwise, ami piwiha waniha gaaha ausaataahura nini windi yamaindi nehi watipihonini isihiyai piwiha kaunditaano ami kimika kaunditandihoniniso.

### **Porihoho Piwiha Ipotihoho Naisihiyai Asisiha Gaahuraare Undataase**

<sup>21</sup> Nahataapa ningi nanoaipati ami otipipati nini kaindi bimohipatapi Tikikaasiho sangi kasatitaise. Iyataati Tikikaasiho so nyahi maariho

waati nunyaaho ami nyamatiyati Awaisihopi giwunyaati, ami komi otipipati nga nawihiyati kiyahore. <sup>22</sup>Nini koai sangisenda nandusoasataayo, ami tanyaaha kimandapo. Ami ko sangi neti anditisaiwati ami nyahi kimbihimohirihiretapi kiya sisaiwi bimopo, satati kasatonihimahi nyapi gwinyaitaatiwo. <sup>23</sup>Naisihiyaate, sahi nyamataiwi Kiraisihopi giwunyaahohiyihyaati nahatiyaatangi nyami Apiho Autaahaatihouni, ami nyami Awaisiho Jisasi Kiraisihouni sami maariho ambipati nepi wisaiapi napaisaatisamaitaise. Sasimi ami sahi ususaati naisihiyaati maariho namindaatiwihandi nasanyami ami sahi Kiraisihopi giwunyaaitaatiwihandi watipihandi nasamitaise. <sup>24</sup>Nini sapi saindi gaapundataayo, sahi nahatiyaati nyami Awaisiho Jisasi Kiraisihoai maariho taawi kiyaatinihi nunyohiyihyaatangi Autaahaatiho gaahati kasitando.